

ORDE do de de 2019 pola que se regula a composición, funcionamento e organización do Consello Asesor Técnico de Atención Primaria.

É unha realidade que o patrón epidemiolóxico da poboación está a cambiar como consecuencia do aumento das enfermidades crónicas e dito cambio está a orixinar unha maior demanda na utilización dos servizos á que ten que adaptarse o sistema sanitario. A poboación de Galicia se atopa entre as máis lonxevas do mundo, cunha esperanza de vida ao nacer superior aos 83 anos, e cun 25% da poboación que supera os 65 anos. Unha situación que, segundo indican as proxeccións, continuará aumentando nos próximos anos de forma moi acusada.

O modelo asistencial tradicional, centrado na resolución das patoloxías agudas, ten por tanto que ir cambiando tamén para adaptarse as novas necesidades. E tamén a división tradicional en dous niveis asistenciais separados dado que será necesario unha visión integradora, novas dinámicas de traballo non soamente entre á atención Primaria e a Hospitalaria, senón tamén con outros axentes implicados nos coidados de diferentes aspectos como os correspondentes a servizos sociosanitarios, os de saúde pública ou as propias asociacións de pacientes.

A Atención Primaria debe constituírse no nivel asistencial que lidere a xestión dos procesos de atención ao enfermo crónico dentro do sistema sanitario e converterse no eixe vertebrador do sistema sanitario. O Servizo Galego de Saúde ten iniciado para iso un proceso no que se tratan de abordar estes retos do futuro e definir as liñas estratéxicas, que podan axudar a que os profesionais teñan máis tempo para atender aos pacientes, a mellorar a coordinación entre a Atención Primaria e o hospital, mellorar a formación e a investigación...

Este proceso de definición estratéxica do novo modelo será desenvolto a través dun Comité técnico de expertos, pero considerase convinte a creación do Consello Asesor Técnico de Atención Primaria que, cun carácter máis permanente poda realizar funcións de asesoramento en relación cos aspectos científicos, sociais e profesionais no ámbito da atención primaria, desde unha visión multidisciplinar, que se reflicte na súa composición, e que poda aconsellar sobre os programas e medidas a desenvolver neste proceso.

En cumprimento do sinalado, esta orde desenvolve o réxime de funcionamento, as funcións como órgano de carácter consultivo e a composición, por persoas de

recoñecido prestixio e cunha traxectoria profesional acreditada no ámbito sanitario, do Consello Asesor Técnico de Atención Primaria .

Na súa virtude, por proposta da xerente do Servizo Galego de Saúde, e no uso das competencias que me son atribuídas pola Lei 1/1983, do 22 de febreiro, reguladora da Xunta e da súa Presidencia,

DISPOÑO:

Artigo 1. Obxecto

Esta orde ten por obxecto regular a composición, funcionamento e organización do Consello Asesor Técnico de Atención Primaria, como órgano colexiado de asesoramento técnico no ámbito da asistencia primaria do Servizo Galego de Saúde.

Artigo 2. Funcións do Consello Asesor Técnico de Atención Primaria

Ao Consello Asesor Técnico correspóndenlle as seguintes funcións:

a) Asesorar ao Servizo Galego de Saúde nos asuntos do seu ámbito de competencias, especialmente no que se refire á prevención, diagnóstico precoz e mellora da accesibilidade da atención sanitaria, sen prexuízo das competencias que poidan ter outros órganos.

b) Propoñer i elaborar programas de intervención comunitaria para á mellora da saúde da poboación.

c) Informar e asesorar sobre as medidas destinadas á mellora da xestión da demanda no ámbito da atención primaria.

d) Asesorar sobre aspectos organizativos necesarios para favorecer a continuidade asistencial e a coordinación e comunicación entre os niveis asistenciais de Atención Primaria e Atención Hospitalaria.

e) Asesorar sobre aspectos relacionados coa formación, docencia e investigación no ámbito da Atención Primaria.

f) Presentar propostas de mellora dos servizos do Servizo Galego de Saúde no ámbito das funcións descritas.

g) Estudar e emitir informe sobre plans, programas ou proxectos, que sexan sometidos á súa consideración.

h) Calquera outra que lle sexa atribuída ou encomendada.

Artigo 3. *Composición*

1. O Consello Asesor Técnico estará formado por un máximo de 40 persoas de recoñecido prestixio, recoñecemento social e traxectoria profesional acreditada no ámbito sanitario.

2. Os membros do Consello Asesor Técnico serán nomeados e cesados pola persoa titular da Presidencia do Servizo Galego de Saúde e entre eles contarase, cando menos con:

- Un vogal a proposta de cada unha das organizacións sindicais con representación na mesa sectorial de Sanidade
- Un vogal a proposta da Sociedade Española de Médicos de Atención Primaria (SEMERGEN).
- Un vogal a proposta da Sociedade Española de Médicos Generales y de Familia (SEMG)
- Un vogal a proposta da Asociación Galega de Medicina Familiar e Comunitaria (AGAMFEC).
- Un vogal a proposta da Asociación Galega de Pediatría de Atención Primaria (AGAPAP).
- Un vogal a proposta da Asociación Galega de Enfermería Familiar e Comunitaria (AGEFEP)
- Un vogal a proposta da Sociedade Galega de Fisioterapeutas (SOGAFI)
- Un vogal a proposta da Federación Galega de Municipios e Provincias (FEGAMP)
- Dos vogais a proposta das Asociacións que forman parte do Consello Asesor de Pacientes do SERGAS.
- Un vogal a proposta dos Colexios Oficiais de Médicos de Galicia.

- Un vogal a proposta dos Colexios Oficiais de Enfermería de Galicia.
- Un vogal a proposta dos Colexios Oficiais de Farmacéuticos de Galicia.
- Un vogal a proposta do Colexio Oficial de Fisioterapeutas de Galicia.
- Un vogal a proposta do Colexio Oficial de Traballadores Sociais de Galicia.
- Un vogal a proposta da Consellería con competencias en materia de Educación
- Un vogal a proposta da Consellería con competencias en materia de Servizos Sociais
- Un vogal de entre os profesionais do ámbito do centro directivo con competencias en Asistencia sanitaria do SERGAS
- Un vogal de entre os profesionais do ámbito do centro directivo con competencias en Recursos económicos do SERGAS
- Un vogal de entre os profesionais do ámbito do centro directivo con competencias en Recursos Humanos do SERGAS
- Un vogal de entre os profesionais do ámbito do centro directivo con competencias en Tecnoloxías da Información da Consellería de Sanidade
- Un vogal de entre os profesionais do ámbito do centro directivo con competencias en Formación do SERGAS
- Un vogal a proposta da Fundación Pública 061 de Galicia

-3. O nomeamento dos membros do Consello Asesor Técnico terá unha duración de 3 anos e poderá ser renovado sucesivamente por outros períodos de igual tempo.

4. Na composición do Consello Asesor procurarase unha igualdade entre o número de homes e mulleres.

5. Cada institución ou órgano representado poderá propoñer unha persoa suplente para o caso de ausencia, vacante ou enfermidade.

Artigo 4. Organización

1. O Consello Asesor Técnico de Atención Primaria terá a seguinte organización: Presidencia, Vicepresidencia, Secretaría e vogais.

2. As persoas titulares da Presidencia e da Vicepresidencia do Consello Asesor Técnico serán designadas pola persoa titular da Presidencia do Servizo Galego de Saúde de entre os membros do Consello.

3. A Secretaría do Consello Asesor Técnico será asumida por unha persoa adscrita ao Servizo Galego de Saúde e designada para tal efecto pola persoa titular da Presidencia do Servizo Galego de Saúde.

Artigo 5. Funcións da Presidencia do Consello Asesor Técnico de Atención Primaria

Corresponde á persoa que exerza a Presidencia de Consello Asesor Técnico de Atención Primaria a realización das seguintes funcións:

- a) Exercer a representación do Consello.
- b) Manter a continuidade do Consello, coordinando as actividades deste e executando os acordos que se adopten.
- c) Acordar a convocatoria das reunións ordinarias e extraordinarias.
- d) Dirimir co seu voto os empates para os efectos de adopción de acordos.
- e) Visar as actas e certificacións de acordos adoptados polo Consello.
- f) Solicitar, en nome do Consello, a colaboración de institucións, autoridades, organismos, entidades, asociacións ou particulares, así como invitar a participar no pleno ou nas comisións que, se é o caso, se poidan crear, a expertos de recoñecida competencia nos asuntos de que se trate.
- g) Outras funcións que lle poidan ser atribuídas.

Artigo 6. Funcións da Vicepresidencia do Consello Asesor Técnico de Atención Primaria

Corresponderá á Vicepresidencia a realización das seguintes funcións:

- a) Asumir a Presidencia do Consello Asesor Técnico de Atención Primaria nos casos de ausencia, vacante ou enfermidade da persoa titular desta.
- b) Participar nas reunións con voz e voto.
- c) Aqueloutras funcións que expresamente lle sexan encomendadas pola Presidencia ou polo Pleno.

Artigo 7. Funcións da Secretaría do Consello Asesor Técnico de Atención Primaria

A persoa responsable da Secretaría terá as seguintes funcións:

- a) Asistir ás sesións con voz e sen voto.
- b) Efectuar a convocatoria das sesións seguindo as instrucións da Presidencia, e realizar as notificacións aos membros do Consello.
- c) Preparar o despacho dos asuntos, redactar e autorizar as actas das sesións, así como realizar o arquivo dos documentos do Consello.
- d) Expedir as certificacións das consultas, ditames ou acordos aprobados.
- e) Aqueloutras funcións inherentes á súa condición.

Artigo 8. Funcións dos vogais

Os vogais terán as seguintes funcións:

- a) Participar nos debates das sesións e emitir o seu voto, así como expresar o sentido deste e os seus motivos, e formular votos particulares.
- b) Presentar propostas de mellora dos servizos, dentro do seu ámbito de competencias.
- c) Formular rogos e preguntas.
- d) Obter a información precisa para cumprir as funcións asignadas.
- e) Outras funcións inherentes á súa representación.

Artigo 9. Réxime de funcionamento

1. O Consello Asesor Técnico de Atención Primaria funcionará en pleno e poderá crear comisións sectoriais, se se estima necesario.

2. O Pleno do Consello reunirse polo menos dúas veces ao ano coincidindo con semestres naturais ou, con carácter extraordinario, por requirimento da Presidencia.

3. As comisións sectoriais que se poidan crear, cuxa composición será acordada polo Pleno, reuniranse cando así sexa necesario para o desenvolvemento das tarefas

específicas que lles sexan encomendadas. A organización e funcionamento destas comisións rexeranse polas normas que se establezan no regulamento de réxime interno.

Artigo 10. *Convocatorias*

1. A convocatoria das reunións do Pleno, será realizada pola Secretaría de acordo coa orde da Presidencia e cos asuntos que esta indique. As comisións sectoriais terán o seu propio réxime de convocatorias de conformidade co acordado polo Pleno.

2. Ao escrito de convocatoria, que incluírá a orde do día, deberá unirse a documentación específica sobre os asuntos que se van tratar e remitirse aos membros do Consello cunha antelación mínima de corenta e oito horas. A convocatoria realizarase por medios electrónicos. Cando a documentación dos asuntos a tratar sexa considerable e dificulte a súa remisión por medios electrónicos, poderase habilitar un acceso a esta para os membros do Consello.

Artigo 11. *Constitución*

1. O Pleno do Consello Asesor Técnico de Atención Primaria considerarase constituído coa presenza das persoas que exerzan a Presidencia e a Secretaría e, polo menos, a metade dos vogais.

2. Poderán asistir ás reunións, con voz e sen voto, aquelas persoas que sexan invitadas pola Presidencia en calidade de expertas en relación coas materias incluídas na orde do día.

Artigo 12. *Réxime de acordos*

1. Os acordos do Consello Asesor Técnico de Atención Primaria adoptaranse por maioría simple.

2. De cada sesión que se celebre levantarase a acta correspondente en que consten os acordos adoptados, que se poderá motivar, se así o solicitan os membros do Consello.

Artigo 13. *Recursos materiais e humanos*

O Servizo Galego de Saúde prestará o apoio administrativo, de persoal e material, que sexa preciso para que o Consello Asesor Técnico de Atención Primaria realice as funcións atribuídas.

Artigo 14. Réxime supletorio

A Lei 16/2010, do 17 de decembro, de organización e funcionamento da Administración xeral e do sector público autonómico de Galicia, será de aplicación supletoria en todo o non previsto nesta orde.

Disposición adicional única. Gasto público

A creación do Consello Asesor Técnico de Atención Primaria non supón incremento do gasto público. A pertenza a este órgano considerase de carácter honorario, e a asistencia ás reunións do Consello non terá carácter retribuído.

Disposición derradeira única. Entrada en vigor

Esta orde entrará en vigor o día seguinte ao da súa publicación no *Diario Oficial de Galicia*.

Santiago de Compostela, -- de ----- de 2019